



Broj: 05/1-50-15-26-19-7/22

Sarajevo, 12. 12. 2022.

IZVJEŠTAJ

sa sastanka članova Nezavisnog odbora Parlamentarne skupštine BiH kao nezavisnog tijela policijske strukture BiH s rukovodstvom Državne agencije za istrage i zaštitu

Sastanak je održan 14. 11. 2022, s početkom u 13 sati, u prostorijama Državne agencije za istrage i zaštitu u Sarajevu. Prisustvovali su: Darko Čulum, direktor Državne agencije za istrage i zaštitu, Đuro Knežević, zamjenik direktora Državne agencije za istrage i zaštitu, Miše Ćavar, prvi zamjenik predsjednika Nezavisnog odbora, Enes Bezdob i Darko Kremenović, članovi Nezavisnog odbora.

Direktor Državne agencije za istrage i zaštitu Darko Čulum poželio je dobrodošlicu članovima Nezavisnog odbora i rekao da je na raspolaganju za sva eventualna pitanja.

Miše Ćavar, prvi zamjenik predsjednika Nezavisnog odbora, ukratko je obrazložio razlog posjete. Istakao je da je posjeta organizirana u skladu s dogovorom s posljednje sjednice Nezavisnog odbora, ali i u skladu s Planom rada Nezavisnog odbora za 2022. godinu, s ciljem održavanja kontinuiteta saradnje s policijskim agencijama iz svoje nadležnosti.

Direktor Državne agencije za istrage i zaštitu Darko Čulum na početku je ukratko upoznao članove Nezavisnog odbora o realiziranim aktivnostima, aktivnostima koje su planirane za naredni period kao i problemima s kojima se susreću u radu.

Istaknuo je da veliki problem za ovu agenciju trenutno predstavlja Pravilnik o unutrašnjoj organizaciji i sistematizaciji radnih mjesta te neusvajanje novog Zakona o policijskim službenicima BiH koji je trenutno u parlamentarnoj proceduri, a kojim se između ostalog predviđa eksterni premještaj policijskih službenika na nivou BiH. Takva izmjena bi bila od velikog značaja za Državnu agenciju za istrage i zaštitu jer bi njegovim usvajanjem bili u mogućnosti preuzeti policijske službenike i iz drugih agencija koji imaju radnog iskustva.

Ovako su „osuđeni“ samo na mlađe inspektore s godinom ili bez radnog iskustva, te njihovo obučavanje iziskuje dosta vremena.

Dalje, direktor je upoznao članove Nezavisnog odbora i o problemu koji imaju sa softverom *interface* koji je potrebno nadograditi, a za čiju nadogradnju bi trebalo izvojiti 4-5 miliona KM. Međutim, Državna agencija za istrage i zaštitu ne raspolaže tim finansijskim sredstvima pa su ih pokušali iznaći kroz razne međunarodne fondove, ali nije uspjelo.

Rukovodstvo Državne agencije za istrage i zaštitu naglasilo je da ima izuzetno dobru saradnju sa ostalim policijskim agencijama u BiH, a posebno su naglasili saradnju s Graničnom policijom BiH kojoj, u skladu sa svojim mogućnostima, pruža podršku u zaštiti državne granice, kao i s Direkcijom za koordinaciju policijskih tijela BiH. Istakli su i veoma dobru saradnju s Tužilaštvom BiH kao i Obavještajno-sigurnosnom agencijom BiH.

Također, imaju dobru saradnju i s međunarodnim predstavništvima u BiH posredstvom kojih se doniraju određena sredstva i održavaju razni vidovi obuka na visokom nivou za policijske službenike.

Članovi Nezavisnog odbora na kraju su naglasili da će Nezavisni odbor, u okviru svojih nadležnosti, nastaviti da pruža podršku radu Državne agencije za istrage i zaštitu, te poželjeli mnogo uspjeha u daljnjem radu ove agencije.

Sastanak je završen u 14 sati.

**PREDSJEDNIK
NEZAVISNOG ODBORA**

Enes Obralića